

# Conradh na Talún

**Ceist 1** Beidh tú ag féachaint ar ball ar thuairisc faoi agóid i gContae Ros Comáin. Sula bhféachann tú ar an mír, pléigh an cheist seo leis an duine in aice leat:

*Cén cineál eagraíochta é Conradh an Talún? Ba cheart go dtabharfadh ainm na heagraíochta nod daoibh.*

**Ceist 2** Gan féachaint ar an mír go fóill, an féidir leat féin agus an duine in aice leat Gaeilge a chur ar na focail agus na frásaí seo?

Court House	_____
County Registrar	_____
repossess	_____
protestors	_____
the power	_____
a handful	_____
before / in front of	_____
put back	_____
financial & legal advice	_____
abandoned	_____
jurisdiction	_____
a married couple	_____

Féach ar an tuairisc le feiceáil an raibh an ceart agaibh.

**Ceist 3** Féach ar an tuairisc arís agus freagair na ceisteanna seo:

1. Cé mhéad duine a ghlac páirt san agóid agus cén fáth?
2. Cá raibh an agóid ar siúl?
3. Cén fáth ar cuireadh an chuid is mó de na hiarratais siar?
4. Cad a deirtear faoi thithe atá tréigthe?

**Ceist 4** An tuiséal ginideach

Bhí na focail thíos le cloisteáil sa mhír. An féidir leat na bearnaí a líonadh leis na focail a leanann iad agus an fhoirm cheart den fhocal sa tuiséal ginideach a sholáthar?

Teach	_____
Cláráitheoir	_____
*Conradh	_____

\*Tá an tríú focal sa teideal seo suimiúil, Cén fáth? Féach ar [www.foclóir.ie](http://www.foclóir.ie) mura bhfuil tú cinnte.

**Ceist 5** ‘...teip ar...’

Tá a lán briathra frásacha (*phrasal verbs*) i nGaeilge. Cad é an réamhfhocal simplí a théann leis na briathra seo thíos agus cuir in abairtí iad chun a mbrí a léiriú?

*teip*  
*éirigh*  
*buail*  
*cuir*  
*bain*

**Ceist 6** ‘...orduithe...’

Ag obair leis an duine in aice leat, déanaigí iarracht an difríocht idir an dá fhocal thíos a mhíniú:

*orduithe* agus *ordaithe*

## Treoracha agus Freagraí

### Ceist 1

Plé atá i gceist leis an gceist seo.

### Ceist 2

Court House	<i>Teach Cúirte</i>
County Registrar	<i>An Cláraitheoir Contae/ Cláraitheoir an Chontae</i>
repossess	<i>athshealbhaigh</i>
protestors	<i>lucht agóide</i>
the power	<i>an chumhacht</i>
a handful	<i>dornán</i>
before / in front of	<i>faoi bhráid</i>
put back	<i>cuir siar</i>
financial & legal advice	<i>comhairle airgeadais agus dlí</i>
abandoned	<i>tréigthe</i>
jurisdiction	<i>dlínse</i>
a married couple	<i>lánúin</i>

### Ceist 3

Féach an script.

### Ceist 4

Teach na Cúirte  
Cláraitheoir an Chontae  
\*Conradh na Talún

\*Is féidir leis an bhfocal ‘talamh’ a bheith firinsneach nó baininsneach. Féach [www.foclóir.ie](http://www.foclóir.ie):

talamh, m. & f. (m. gs. [-aimh](#), f. gs. [talún](#); pl. [tailte](#)). [Earth](#), [ground](#), [land](#)

### Ceist 5

- teip ar *fail*
- éirigh le *succeed*
- éirigh as *retire, quit, give up*
- buail le *meet*
- cuir as (do) *annoy*
- cuir faoi *live*
- bain le *relate to*

### Ceist 6

An t-ordú – an tuiséal ainmneach uatha  
Na horduithe – an tuiséal ainmneach iolra  
Ag an ordú – an tuiséal tabharthach  
Méid an ordaithe – an tuiséal ginideach uatha  
Méid na n-orduithe – an tuiséal ginideach iolra

Tá sé ordaithe – an aidiacht bhriathartha

### Eimear Ní Chonaola

Ghlac tuairim is dhá dhuine dhéag páirt in agóid taobh amuigh de Theach na Cúirte i mBaile Ros Comáin, áit a raibh Cláraitheoir an Chontae ag plé le os cionn seachtú iarratas ar thithe a athshealbhú sa gcontae<sup>1</sup>. Deir *Conradh na Talún* go mbeidh daoine i gContae Ros Comáin gan teach, gan áras má cheadaítear na horduithe.

### Sorcha Ní Mhonacháin

Lucht agóide ón eagraíocht *Conradh na Talún* taobh amuigh de Theach Cúirte Ros Comáin ar maidin. Taobh istigh bhí os cionn seachtú iarratas le hathshealbhú a dhéanamh ar thithe sa chontae á bplé i láthair Chláraitheoir an Chontae, Fintan Murphy.

### Séamas Millar, Conradh na Talún

Níl cead ag éinne ...a thógáil...do theach a thógáil... fan ann. Tá muid ag iarraidh daoine a oiliúint agus, cineál, cumhacht a thabhairt dóibh. Má thuigeann siad an chumhacht atá acu, sílim go mbeidh níos mó daoine ag teacht chuig an gCúirt agus seasamh a dhéanamh dá gcuid tithe.

### Sorcha Ní Mhonacháin

Ní raibh ach dornán de na daoine a bhfuil iarrataisí<sup>2</sup> athshealbhaithe ina n-éadan i láthair inniu. Cuireadh an chuid is mó de na hiarrataisí a tháinig faoi bhráid Chláraitheoir an Chontae anseo i Ros Comáin inniu siar go gceann cúpla mí eile, le seans a thabhairt do na teaghlaigh ráitis airgeadais a chur ar fáil. Arís agus arís eile, mhol an Cláraitheoir do na teaghlaigh comhairle airgeadais agus dlí a fháil sula dtiocfaidh siad i láthair arís.

Chualathas i rith na héisteachta go raibh an chosúlacht ar chuid de na tithe nach raibh cónaí iontu níos mó; nó go raibh siad fágtha tréigthe ag an úinéir fiú amháin. I roinnt cásannaí<sup>3</sup> tugadh le fios go raibh úinéirí na dtithe ina gcónaí taobh amuigh den dlínse agus gur theip ar iarrachtaí teagmháil a dhéanamh leo. I gcás amháin ar leith, tugadh le fios go raibh lánúin a bhfuil ordú athshealbhaithe á réiteach ar a dteach ina gcónaí anois i mBrisbane<sup>4</sup> na hAstráile. D'ordaigh an cláraitheoir go seolfaí cáipéisí dlí maidir leis an athshealbhú chuig an tseoladh<sup>5</sup> i mBrisbane.

Sorcha Ní Mhonacháin, Nuacht TG4 i Rós Comáin.

---

<sup>1</sup> Cuirtear urú ar an ainmfhocal tar éis *sa* i gcanúint Chonnacht.

<sup>2</sup> *iarratais* atá sa Chaighdeán Oifigiúil

<sup>3</sup> *cásanna* atá sa Chaighdeán Oifigiúil

<sup>4</sup> in Brisbane atá sa Chaighdeán Oifigiúil

<sup>5</sup> *chuig an seoladh* atá sa Chaighdeán Oifigiúil